

Nersussuit puulukillu nujuitsut neqaannik ilivitsunik aamma affarnik nioqqutissat 1999-mi eqqussuinermi akitsuutaarutsinneqarnerisa sunniutaannik nalilersuinermik Naalakkersuisut UKA2022-mi saqqummiussinissaat pillugu Inatsisartuni aalajangiiffigisassatut siunnersuut. Nalilersuinermi ilaatigut akitsuutaarutsitsinermi ataatsimut piffinnilu suliffissaqartitsinikkut sunniutit kiisalu neqinik igaannariangorlugit sulianik eqqussuisarnermut sunniutit ilanngunneqassapput. Taamattaq nalilersuinermi nunatsinni neqinik tunisassianik suliarinnittarneq annertunerulersinniarlugu eqqussuinermik killiliissutaasinnaasut qulaajarnissaat ilaatinneqassaaq.

Mariane Paviassenimit, Inuit Ataqatigiit, saqqummiunneqartoq

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Mariane Paviassen, Inuit Ataqatigiit, siulittaasoq

Inatsisartunut ilaasortaq Lars Poulsen, Siumut, siulittaasup tullia

Inatsisartunut ilaasortaq Aqqalu Jerimiassen, Atassut

Inatsisartunut ilaasortaq Karl Tobiassen, Siumut

Inatsisartunut ilaasortaq Knud Mathiassen, Inuit Ataqatigiit

Inatsisartunut ilaasortaq Harald Bianco, Inuit Ataqatigiit

Inatsisartunut ilaasortaq Aslak Wilhelm Jensen, Siumut

Ataatsimiititaliap UKA2021-mi ulloq 4. november siullermeerinninnerup kingorna siunnersuut misissuataarpaa.

Siunnersuutip imarisaa siunertaalu

Siunnersuuteqartup siunnersuutimigut kissaatigaa nersutit nujuitsut timaannik ilivitsunik aamma affarnik nioqqutissat 1999-mi eqqussuinermi akitsuutaarutsinneqarnerisa sunniutaannik, ilaatigut akitsuutaarutsitsinerup suliffissaqartitsinikkut sunniutaannik kiisalu neqinik igaannariangorlugit sulianik eqqussuisarnermut sunniutaannik, nalilersuinissamut Naalakkersuisut pisussaaffilerneqassasut. Nunatsinni neqinik tunisassianik suliarinnittarneq

annertunerulersinniarlugu eqqussuinermik killiliissutaasinnaasut nalilersuinermi qulaajarneqarnissaat taamatutaaq kissaatigineqarpoq.

Siunnersuutip Inatsisartuni siullermeerneqarnera

Akitsuutaarutsinerup pissusiviusut eqqarsaatigalugit siunertarineqartutut suliffissaqartitsiniarnikkut sunniuteqarsimanerata misissussallugu pissusissamisoorneranik siunnersuuteqartup isumaa paasilluarsinnaallugu siullermeerinninnermi Naalakkersuisut oqaatigaat. Naalakkersuisut oqaatigaat akileraartarnermik akitsuusersuisarnermillu iluarsaaqqinnissamut nalunaarutigineqareersumut atatillugu tamatuma pinissaa kissaatigigitsik.

Naalakkersuisut taamaattumik allannguutissatut siunnersuuteqarput ima oqaasertalimmik:

Nersussuit puulukillu nujuitsut neqaannik ilivitsunik aamma affarnik nioqqutissat eqqussornerani akitsuutaarutsinneqarnerisa sunniutaannik, akileraartarnermi aamma akitsuusersuinermi aaqqissuussinermut ataqatigiissillugu Naalakkersuisut nalilersueqquneqarnerat pillugu Inatsisartuni aalajangiiffigisassatut siunnersuut.

Inuit Ataqatigiit Naalakkersuisut allannguutissatut siunnersuutaat taperserpaat. Naleqqap siunnersuut tikilluaquaa oqaatigalugu akitsuutaarutsitsisimaneq annertunerusumik illoqarfinni anginerni ilinniarsimasunik neqaarnialinni sunniuteqarsimasooq, akerlianilli sumiiffiit mikinerusut akitsuutaarutsitsisimaneq iluaqutigisimagunanngikkaat. Ilanngullugu oqaatigineqarpoq akitsuutaarutsitsisimaneq nunatsinnit neqinit tunisassiat ingiarneqarsimanerannik kinguneqarsimagunartoq. Tamanna tunngavigalugu Naalakkersuisut allannguutissatut siunnersuutaat Naleqqap taperserpaa.

Siumup siunnersuutaqqaartoq taperserpaa tassami akitsuutaarutsitsinermi suliffissaqartitsiniarnikkut pissarsiassatut naatsorsuutigineqarsimagaluartut soq piviusunngortinneqarsimannginnersut misissussallugu pissusissamisoormat.

Atassutip siunnersuut taamatutaaq taperserpaa, nalilersuinerulli Naalakkersuisut akileraartarnermik iluarsaaqqinnerannut ilaatinneqarsinnaanissaa ammaffigalugu. Demokraatit siunnersuut tapersersunngilaat, isumaqaramik siunnersuut nersutit timaannik ilivitsunik affarnillu eqqussuinermit akitsuutit eqquteqqinneqarnissaannik siunertaqartoq. Taamattorli Naalakkersuisut allannguutissatut siunnersuutaat taperserneqarpoq.

Ataatsimiititaliap siunnersuummik suliarinninnera

Akileraartarnermut akitsuusiisarnermullu tunngasuni iluarsaaqqinnissamik suliamut ingerlasumut nalilersuinerup ilaatinneqarnissaanik Naalakkersuisut kissaateqarnerat ataatsimiititaliap paasilluarsinnaavaa. Taamaattorli ataatsimiititaliaq isumaqarpoq pingaaruteqartoq erseqqissassallugu nalilersuinermi akitsuutaarutsitsinerup ataatsimut piffinnilu suliffissaqartitsinikkut sunniutai kiisalu neqinik igaannariangorlugit sulianik eqqussuisarnermut sunniutai ilanngunneqartariaqarmata. Taamatutaaq nalilersuinermi

nunatsinni neqinik tunisassianik suliarinnittarneq annertunerulersinniarlugu eqqussuineramik killiliissutaasinnaasut qulaajarnissaat ilaatinneqartariapoq. Ataatsimiititaliaq taamaattumik Naalakkersuisut allannguutissatut siunnersuutaannut iluarsissutaasumik allannguutissatut siunnersuuteqarput matuminnga:

Nersussuit puulukillu nujuitsut neqaannik ilivitsunik aamma affarnik nioqqutissat eqqussornerani akitsuutaarutsinneqarnerisa sunniutaannik, akileraartarnermi aamma akitsuusersuinermi aaqqissuussinermut ataqatigiissillugu, nalilersueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalilersuinermi ilaatigut akitsuutaarutsitsinermi ataatsimut piffinnilu suliffissaqartitsinikkut sunniutit kiisalu neqinik igaannariangorlugit sulianik eqqussuisarnermut sunniutit ilanngunneqassapput. Taamattaq nalilersuinermi nunatsinni neqinik tunisassianik suliarinnittarneq annertunerulersinniarlugu eqqussuineramik killiliissutaasinnaasut qulaajarnissaat ilaatinneqassaaq.


Aningaasaqarnikkut allaffissornikkullu kingunerisassai

Nalilersuinerup kissaatigineqartup AC-fuldmægtigip ukioq naallugu sulineranut naleqartumik ingerlanneqarsinnaanissaa siunnersuuteqartup missingerpaa. Nalilersuineq iluarsaaqqinniarluni sulinermut annertunerusumut ilaatinneqassappat ataatsimiititaliap naatsorsuutigaa sulinerup ilarujussua iluarsaaqqinniarluni suliniarnermut killiliussat iluanni nammassineqarsinnaassasoq, taamalu killiliussat annertusineqarnissaat pisariaqassanani.

Ataatsimiititaliap inassuteqaatai

Allannguutissatut siunnersuut ataatsimiititaliamit saqqummiunneqartoq akuersissutigineqassasoq, ataatsimiititaliamit isumaqatigiittumit inassutigineqarpoq.

Taamatut oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Mariane Paviassen
Siulittaasoq




Lars Poulsen
Siulittaasup tullia


Aqqalu Jerimiassen



Karl Tobiassen



Knud Mathiassen



Harald Bianco



Aslak Wilhelm Jensen